



葫蘆島

一位置及沿革 葫蘆島在本境東南部濱遼東灣之西岸距北寧路綫連山站三十里自西北而東南伸入海中之小半島也長約六七里微作罄折形南端外峻而稍突出中部罄折處稍狹有若葫蘆故名島之名始見於金遼志明天啓時孫文正公承宗巡視沿海要隘嘗至斯島蓋在明季已爲軍事重要之區也清之末葉旅大先後割租日俄東北之門戶頓失適徐世昌制軍總督東三省乃請之政府擬築此港自斯以後葫蘆島之名始爲中外所注視矣

二形勢及交通 全島斜峙海中南端多由山岩而成蓋興城附近之海山山

脈逶迤至此而爲島之骨幹故全島皆山惟由大陸垂沙崗一道伸入海中若繩索之繫葫蘆者然此沙崗斷隔海潮因名爲斷崗崗之北爲鐵路停車場島之東南端曰葫蘆嘴與天橋廠遙對相距三十里許環抱成一大海澳即所謂連山灣也北有西海口爲帆船停馳之碼頭西南爲獅子頭遙望斷崗有半拉山突出焉山與獅子頭相距之灣曰葫蘆套山南有小島曰高梁垛聳立海中之石岩也與獅子頭半拉山作鼎足之勢即今所擬開之商埠也就全島之交通言之北距錦縣百餘里西距錦西九十里西南距興城六十里適居三縣之中心由支線至連山站再東北至遼寧省城五百餘里較之遼寧至大連間之南滿路綫尙近數十里誠爲遼寧物產輸出最便利之

商港也況有冬不結凍之價值可補營口之缺陷乎又西與秦皇島爲唇齒之關係北與北寧路有銜接之作用故可控制華北成遼東之要隘焉

三開港之計劃 清光緒三十四年秋聘英國工程師秀恩巡勘得要點如下

(甲)水量 高粱梁迤東一段潮落時水深二丈六尺九寸獅子頭迤南一

段潮落時水深二丈八尺二寸若潮漲時約深四丈餘雖大輪亦可出入無

阻(乙)冰期 島較秦皇島略爲和暖冬令極寒時水深處僅有冰塊隨波

起伏雖有凍封地方只在海岸可用碎冰機撞碎之則冬間停舶毫無障碍

(丙)築堤 港口南向而寬濶入夏西南風起波濤洶涌船舶停泊不易須

于港口建水隄一道爲船舶避風之所秀恩相度形勢曾經兩度計劃其先

由高粱垞起向正南修出二千尺轉向正東修出一千七百尺爲一段東由獅子頭起向南修出一千八百尺爲一段兩堤交切廻護以禦海風旋又改訂計劃由斷崗起繞半拉山高梁垞至獅子頭對面修曲堤一道長五千英尺預計舶輪四十艘若冬日堤內結冰仍可舶於堤外惟核算修堤經費以普通修堤之價值言之每英尺約需八十英磅總計五千尺約須四十萬英磅須五六年始能竣工此當時前後之查勘計劃也（丁）修路 港距連山站三十里經秀恩勘定路線修支路一段以聯絡之由斷崗起循海岸迤西南至望海寺折向西北過山城子馬帳房以直接連山站業已竣工矣統計開港之費預算爲英金八十萬磅清宣統二年秋于灣口附近起始開工所

築碼頭長約里許翌年八月革命軍興工事遂停民國成立後交通部人員提議復修旋即發生地方問題周肇祥被命爲葫蘆島開埠督辦幾經波折始漸就緒故開闢商埠綱要首即提載由部省合辦而于第二項條文載明地方所有權完全屬於奉天所有一切應行事宜屬於地方行政者須由督辦商承奉天省長辦理又以開埠之初未曾呈報主管機關之農工部復發生局部爭執歷久不決至籌款建築惟在借債而以地位之關係時虞外人挾制故遷延十餘年仍在籌備進行中也

四現在之概況 當時工程師計劃建築樓房因其大小之不同有一號至八號之稱其中之五六七三座均以款缺未建現僅有一二三八四五座以八

號爲最大至于街市已粗具雛形中部以南居民甚少又無商舖僅有商埠局住于二號樓房航警學生四十人警兵百二十名住三號樓房駐防陸軍一連住一號樓房而已此外有森林公司一所在島上造林牧畜場一所飼養美利奴羊數百頭獲利甚厚

城池 市鎮附

縣城 縣城未設治前舊名剛家屯爲錦縣極西之一鎮初無城池也錦西鄉土志云元明時代爲臧家堡後臧轉晉剛堡更名屯故有剛家屯之名俗以江代剛清光緒三十二年始設廳治民國二年改廳爲縣無城遜清末葉因盜賊蜂起居民於城之四周築土圍以防禦焉東西長三里許南北寬一里有奇周圍約八里東迄郵政局西至西卡門爲商業麇聚之區亦往來之通衢也街之中心爲大什字街菜行在焉沿日中爲市之風每屆三六九日爲集商民交易摩踵駢肩大有山陰道上應接不暇之勢大什字街迤北爲後街回族多居於此有禮拜寺一處爲回民瞻仰之所其南折而東爲東腰街

西行爲西腰街東腰街之東爲東南街其西南則爲財神廟街城圍之西曰西園子街居民多以種菜爲業統計全城共分六街即俗所呼六段也城南接鳳凰山山上有礮台爲縣城之要隘每至青紗帳起之時駐鄉團以扼守之實有居高臨下俯視甕底之形勢北臨女兒河如匹練縈環或謂城形似船彷彿傍女兒河而停舶焉商民安於樸拙仍沿勤儉之遺風故無娛樂場所以資遊息地方當局將有創辦公園之計劃俾一般人民得於工作餘暇優遊賞玩調劑疲勞之身心焉

高橋鎮 爲北寧路線經過之地點設車站於東南隅交通便利商業繁盛有東西大街一道商號百餘家民國十四年郭松齡倒戈奉軍駐重兵於此以

後戰事迭興供給浩繁遂致商業凋零如江河日下矣有稅捐局分卡權運局而省立第四師範學校復設於此本境就學士子咸稱便焉

連山鎮 亦北寧路綫經過之地點設車站於南隅舊爲明清用武之地光緒三十四年葫蘆島開埠由此建築支路於是連山灣之名始騰譽於中外民國十四年郭松齡倒戈兩軍曾鏖戰於此死傷遍野自經此役復爲軍事上之重地然商民損失不可數計全鎮之元氣遂一蹶不振矣有稅捐分卡電報局商號僅三四十家

虹螺岬鎮 在城東五十里爲往來錦縣之通衢商業興盛戶口繁碩實本縣之巨鎮也錦西稅捐總局設立於此有商號百餘戶其中業皮張者佔六七

十家每屆秋季皮市最盛凡本境及熱河入口之皮張咸以此爲聚場馬市亦盛遼東西之採購者每以此爲目標焉盛京通志云錦縣西五十里有古虹螺峴考遼金元三史無此名惟唐書唐平高麗置縣百或係其遺址今不可考

暖池塘鎮 在城北二十五里有商號二十餘家鎮西北有暖泉故名

沙鍋屯鎮 在城北五十里有商號十餘家鎮東有通裕煤礦公司昔稱產煤最富之區今停辦

公廨

縣公署 舊在城內西街所有房間不敷應用於民國十年七月經邑紳張存山趙燮等建議另建公署以期鞏固所需經費除變賣舊公署價款外餘均由地方籌集由縣知事鄒健鵬呈請照准在縣城東腰街購置地基是年七月開工十一年七月竣工大門一間東西門房十四間頭過廳五間東西廂房十間二過廳五間東西廂房六間後院內宅七間東西廂房四間東跨院爲地方公欸經理處正房兩進第一層五間第二層四間西跨院爲看守所獄門二間門房二間東廂房七間佈置井井煥然一新

教育公所 在東大街於民國五年經教育公所所長張效良購置民國十四

年由所長李永滋翻蓋一新大門一間東西門房四間頭過廳五間東西廂房六間二過廳五間後院內宅三間後門樓一間建築鞏固規模宏壯堪爲縣城各署之冠

警甲所 在東大街路南大門一間東西門房六間正房九間東西廂房十間
係地方公產

電話局 在後街西隅租賃民房

電報局 在財神廟院內借用廟產


郵政局 在東大街租賃民房

稅捐局分卡 在西大街租賃民房

常關局分卡 在西大街租賃民房

商會 現無會址

農會 現無會址



道路

錦西東接錦縣南通興城其連山高橋二處地扼衝要爲往來之通衢舊時鐵路未通凡由北平赴遼寧者必取道於此東西行旅絡繹不絕自北寧路通車後并於此兩地設站其位置之重要有如此者

本境西沿柳條邊與熱河毗界凡出入口之貨物多取道本境以運輸於內外自錦朝路線通車後往來悉由該處而本境之行旅漸稀

由縣城東行經東老爺廟錢遶屯團山子靠山屯至虹螺岬計程五十里又東行經臥佛寺網戶屯鷹手堡高台子計二十里入錦縣界又東行三十里始達錦縣縣城此道爲往來通衢車馬擁途多際有電車行駛尤稱便利

由縣城南行經仁義屯南北偏道馬家溝前後千峪南老邊至寺兒堡計程四十里又南行經碾盤溝南山口計十二里入興城縣界又南行二十八里至興城縣縣城

由縣城西行經周鐵屯于屯王屯樓房平嶺子熊屯戴機房楊屯至新台門計四十里又西行入朝陽境再行二百里至凌源縣城凡凌源之有事於遼寧者往來咸由此路

由縣城東北行經安昌峴暖池塘沙鍋屯至松嶺門計程九十里門北爲義縣界